

29 MAR 2002  
India-Islam/I  
DR MAHATHIR AKAN RASMI PAMERAN SENI ISLAM INDIA

KUALA LUMPUR, 29 Mac (Bernama) -- Satu pameran Kesenian Islam India, pameran pertama seumpamanya di rantau ini, akan berlangsung selama tiga bulan di Muzium Kesenian Islam Malaysia di sini.

Persuruhjaya Tinggi India ke Malaysia Veena Sikri berkata Perdana Menteri Datuk Seri Dr Mahathir Mohamad dijadual merasmikan pameran itu esok. Jualan dan pameran barang kemas India juga turut diadakan.

"Pameran itu dijayakan dengan kerjasama Muzium Nasional New Delhi," katanya kepada Bernama di sini.

Sikri berkata pameran itu mengetengahkan 174 koleksi hasil seni kesultanan Mogul India milik Muzium Nasional New Delhi.

"Artifak-artifak itu dipilih khusus bagi memberi pemahaman yang lebih mendalam mengenai kesenian dan kebudayaan Islam India serta pengaruhnya ke atas kesenian Islam dan Dunia Melayu," katanya.

Ini termasuk manuskrip dan antikuiti penting milik maharaja Mogul mengandungi pengisytiharaan diraja, spesimen kaligrafi, lukisan kecil, koleksi seni hiasan, barang kemas, tekstil, senjata api serta wang emas dan perak.

"Sebahagian koleksi itu tidak pernah dipamerkan di luar India dan pertama kali di bawa ke sini," katanya.

Satu daripada bahan itu ialah folio kecil Al-Quran abad ke-15, bertulis tangan dalam skrip Naskh menggunakan kertas ditabur emas.

Kulit al-Quran itu mempunyai cap mohor Maharaja Mogul Shah Jahan, sekaligus Quran itu dipercayai ditulis antara 1627-1657.

Sikri berkata koleksi pada pameran itu meliputi kronologi penting pencapaian artistik dan pengaruh yang menjurus kepada kemasyuran kesenian India di bawah pemerintahan Islam.

Tokoh dari institusi tempatan dan India yang khusus dalam kesenian dan sejarah Islam India akan turut memberi ceramah sempena pameran itu selain demonstrasi kraftangan tradisional India, aktiviti untuk kanak-kanak dan persembahan tarian Kathak.

Satu buku katalog yang ditulis oleh Dr Nasim Akhtar dan kurator lain di Muzium Nasional New Delhi yang direka bentuk dan disunting oleh Muzium Kesenian Islam Malaysia yang memaparkan sejarah Islam dan kesenian Islam di benua kecil India juga akan dijual di kedai muzium itu pada harga RM75 senaskah.

-- BERNAMA  
RV AKT LAT